

供三火、滅三火

## 《雜阿含 93 經》

大正 93/印順 1268/佛光 1152 (婆羅門 AN7.47)

如是我聞：一時，佛在拘薩羅人間遊行，至舍衛國祇樹給孤獨園。

時，有長身婆羅門作如是邪盛大會：以七百特牛行列繫柱，特特、水牛及諸羊犢，種種小蟲悉皆繫縛，辦諸飲食廣行布施，種種外道從諸國國皆悉來集邪盛會所。

時，長身婆羅門聞沙門瞿曇從拘薩羅人間遊行，至舍衛國祇樹給孤獨園，作是念：「我今辦邪盛大會，所以七百特牛行列繫柱，……乃至小小諸蟲皆悉繫縛，為邪盛大會故，種種異道從諸國國來至會所，我今當往沙門瞿曇所，問邪盛法，莫令我作邪盛大會，分數中有所短少。」

作是念已，乘白馬車，諸年少婆羅門前後導從，持金柄傘蓋，執金澡瓶，出舍衛城，詣世尊所，恭敬承事。

至精舍門，下車步進，至於佛前，面相問訊、慰勞已，退坐一面，白佛言：「瞿曇！我今欲作邪盛大會，以七百特牛行列繫柱，……乃至小小諸蟲皆悉繫縛，為邪盛大會故，種種異道從諸國國皆悉來至邪盛會所，又聞瞿曇從拘薩羅人間遊行，至舍衛國祇樹給孤獨園，我今故來請問瞿曇邪盛大會法諸物分數，莫令我所作邪盛大會諸分數之中有所短少。」

佛告婆羅門：「或有一邪盛大會主行施作福而生於罪，為三刀劍之所刻削，得不善果報，何等三？謂：身刀劍、口刀劍、意刀劍。

何等為意刀劍生諸苦報？如**一會主造作大會，作是思惟：『我作邪盛大會，當殺爾所少壯特牛，爾所水特、水特，爾所羊犢及種種諸蟲。』**是名意刀劍生諸苦報，如是，施主雖念作種種布施、種種供養，實生於罪。

云何為口刀劍生諸苦報？有一會主造作大會，作如是教：『我今作邪盛大會，汝等當殺爾所少壯特牛，……乃至殺害爾所微細蟲。』是名口刀劍生諸苦報，大會主雖作是布施、供養，實生於罪。

云何為身刀劍生諸苦報？謂：有一大會主造作大會，自手傷殺爾所特牛，……乃至殺害種種細蟲，是名身刀劍生諸苦報，彼大會主雖作是念種種布施、種種供養，實生於罪。

然，婆羅門當勤供養三火，隨時恭敬，禮拜奉事，施其安樂，何等為三？一者根本，二者居家，三者福田。

何者為根本火，隨時恭敬，奉事供養，施其安樂？謂：善男子方便得財，手足勤苦，如法所得，供養父母，令得安樂，是名根本火；何故名為根本？若善男子從彼而生，所謂父母，故名根本，善男子以崇本故，隨時恭敬，奉事供養，施以安樂。

何等為居家火，善男子隨時育養，施以安樂？謂：善男子方便得財，手足勤苦，如法所得，供給妻子、宗親、眷屬、僕使、傭客，隨時給與，恭敬施安，是名家火；何故名家？其善男子處於居家，樂則同樂，苦則同苦，在所為作皆相順從，故名為家，是故，善男子隨時供給，施與安樂。

何等名[福]田火，善男子隨時恭敬，尊重供養，施其安樂？謂：善男子方便得財，手足勤勞，如法所得，奉事供養諸沙門、婆羅門善能調伏貪、恚、癡者，如是等沙門、婆羅門，建立福田，崇向增進，樂分樂報，未來生天，是名[福]田火；何故名田？為世福田，謂為應供，是故名田，是善男子隨時恭敬，奉事供養，施其安樂。」

爾時，世尊復說偈言：「

根本及居家，應供福田火，是火增供養，充足安隱樂。

無罪樂世間，慧者往生彼，如法財復會，供養所應養，

供養應養故，生天得名稱。」

「然，婆羅門！今善男子先所供養三火應斷令滅，何等為三？謂：貪欲火、瞋恚火、愚癡火。所以者何？

若貪火不斷、不滅者，自害、害他，自他俱害，現法得罪，後世得罪，現法後世得罪，緣彼而生心法憂苦；恚火、癡火亦復如是。

婆羅門！若善男子事積薪火，隨時辛苦，隨時然，隨時滅火因緣受苦。」

爾時，長身婆羅門默然而住。時，有婆羅門子名鬱多羅，於會中坐。長身婆羅門須臾默然，思惟已，告鬱多羅：「汝能往至邪盛會所，放彼繫柱特牛及諸眾生受繫縛者，悉皆放不？而告之言：『長身婆羅門語汝：隨意自在，山澤曠野，食不斷草，飲淨流水，四方風中受諸快樂。』」

鬱多羅白言：「隨大師教。」

即往彼邪盛會所放諸眾生，而告之言：「長身婆羅門語汝：『隨其所樂，山澤曠野，飲水食草，四風自適。』」

爾時，世尊知鬱多羅；知已，為長身婆羅門種種說法，示教照喜，如律，世尊說法先後，說戒、說施及生天功德，愛欲味患、出要清淨，煩惱清淨，開示(顯現)。譬如鮮淨白氈易受染色，長身婆羅門亦復如是，即於座上見四真諦，得無間等。

時，長身婆羅門見法、得法、知法、入法，度諸疑惑，不由他度，於正法中得無所畏，即從座起，整衣服偏袒右肩，合掌白佛：「已度，世尊！我從今日盡其壽命，歸佛、歸法、歸比丘僧，為優婆塞，證知我，唯願世尊與諸大眾受我飯食。」

爾時，世尊默然而許。

時，長身婆羅門知佛受請已，為佛作禮，右繞三匝而去。

長身婆羅門還邪盛處，(作)諸供辦淨美好者，布置床座，遣使請佛，白言：「時到，惟聖知時。」

爾時，世尊著衣持鉢，大眾圍繞，往到長身婆羅門會所，大眾前坐。時，長身婆羅門知世尊坐定已，手自供養種種飲食。食已，澡漱洗鉢畢，別敷卑床，於大眾前端坐聽法。

爾時，世尊為長身婆羅門說種種法，示教照喜已，從座起而去。

